

თბილისის “დინამო” ამარცხებს თასის მფლობელს

მოსკოვი. 3 მაისი.

თბილისის “დინამოსთან” შეხვედრამდე მოსკოვის “ლოკომოტივს” არა ჰქონდა არც ერთი დამარცხება და 10 ქულით ლიდერთა შორის იმყოფებოდა. ამიტომ მატჩი თასის მფლობელთან სერიოზულ გამოცდას წარმოადგენდა თბილისელთათვის.

გამოცდა გუნდმა ჩინებულად ჩაატარა. სულ 4 წუთი იყო გასული პირველი სასტვენიდან და გავნიძემ ძლიერი დარტყმით გახსნა ანგარიში. მე-16 წუთზე მელაშვილმა შესანიშნავი დარტყმით მეორე ბურთი გაიტანა, ხოლო 10 წუთის შემდეგ იამანიძემ კუთხური საჯარიმოდან გათამაშებული ბურთი კარში გაგზავნა – 3:0.

მეორე ტაიმი კვლავ დინამოელთა იერიშით დაიწყო და მალე იამანიძემ ანგარიში ოთხამდე აიყვანა. მხოლოდ ამის შემდეგ შეძლეს მოსკოველებმა თამაშში გარდატეხის შეტანა და 24-ე წუთზე გაქვითეს ერთი ბურთი. 31-ე წუთზე “დინამოს” კარში 11-მეტრიანი საჯარიმოდან გატანილ იქნა მეორე გოლი, ხოლო ორი წუთის შემდეგ მცველთა შეცდომის შედეგად ანგარიში გახდა 3:4.

დარჩენილ დროში დინამოელები თამაშობდნენ უშეცდომოდ და ანგარიში შენარჩუნებულ იქნა. თბილისის “დინამომ” მოიპოვა შესანიშნავი გამარჯვება თასის მფლობელზე და გათამაშების ერთ-ერთ ლიდერზე – 4:3.

თბილისელები ამ მატჩში თამაშობდნენ შემდეგი შემადგენლობით: ს. კოტრიკაძე, ჩოხელი, სიჭინავა, ხოჭოლავა, ხუნდაძე, ლოლობერიძე, გავნიძე, ბარქაია (ნორაკიძე), მელაშვილი, იამანიძე, მესხი.

“ლელო”, 4 მაისი, 1958 წ.